

# BARAZA LA WAWAKILISHI ZANZIBAR

Simu Nam. + 255 24 2230602/1  
Fax Nam. + 255 24 2230215  
Tovuti: [www.zanzibarassembly.go.tz](http://www.zanzibarassembly.go.tz)



SANDUKU LA BARUA 902,  
ZANZIBAR  
Barua Pepe: [zahore@zanlink.com](mailto:zahore@zanlink.com)

## **HOTUBA YA MAONI YA KAMATI YA KUSIMAMIA AFISI ZA VIONGOZI WAKUU WA KITAIFA KUHUSIANA NA UTEKELEZAJI WA MAAGIZO YA KAMATI YA MWAKA 2016/17 KWA OFISI YA RAIS NA MWENYEKITI WA BARAZA LA MAPINDUZI**

Mheshimiwa Spika,

Kwanza kabisa sina budi kupeleka shukrani zangu kwa mwenyezi mungu mwingi wa rehema ,muumba mbingu na ardhi na vilivyomo ndani yake kwa kutujaalia, uhai na afya njema na kuweza kukutana katika baraza hili tukufu kwa lengo la kutimiza wajibu wetu uliotuweka baraza hili tukufu kwa lengo la kutimikia wananchi wa Zanzibar . Pia naomba kutumia fursa hii kukupongeza wewe Mheshimiwa Spika kwa kuweza kulingoza baraza hili kwa ustadi, uwelidi na umahiri wa hali ya juu na kutuwezesha sisi wajumbe wake kuweza kufikia malengo yaliyotuweka katika baraza hili. Ni matumaini yangu kuwa kwa uwezo wake Allah (S.W) utaendelea kulingoza baraza hili. Wewe na wasaidizi wako kwa ustadi uadilifu wa hali ya juu kwa dhamira ya kuimarisha demokrasia katika chombo hiki muhimu cha wananchi

**Mheshimiwa spika**

Sitaacha kuutumia fursa hii adhimu kumshukuru na kumpongeza kwa dhati ya moyo wangu Rais wetu mpendwa Mhe. Dkt. Ali Mohammed Shein kwa ustadi, umahiri,

uweledi na busara kubwa ya aina yake anayotumia katika kuiongoza nchi yetu ni ukweli usiofikichika kwamba amekua mstari wa mbele katika kuhakikisha kwamba wananchi wake wa Zanzibar wanapata maisha bora kwa hivyo ni wajibu wetu sote kumuombea dua kuiongoza nchi yetu, Mwenyezi Mungu azidi kumpa nguvu na maisha marefu, busara, hikima na afya njema ili aweze kutuongoza kwa umakini zaidi na tuweze kuendelea kuishi kwa amani na utulivu wa hali ya juu zaidi katika nchi yetu.

Aidha sina budi kumpongeza Mh. Waziri wa Nchi Ofisi ya Rais Mwenyekiti wa Baraza la Mapinduzi Mhe. Issa Haji Ussi (Gavu) kwa umahiri wake katika kuiongoza Ofisi hii ambayo ni muhimu kwani ndiyo Ofisi ya kiongozi wetu mkuu wa nchi. Vile vile nawapongeza watendaji wote wa Ofisi hii wakiongozwa na Katibu Mkuu Ndg. Salum Maulid Salum na watendaji wenzake kwani utendaji wao wa kazi ndio chachu ya mafanikio katika Ofisi hii. Niwaombe wazidi kuzidisha bidii katika utendaji ili malengo yaliyokusudiwa yaweze kufikiwa.

Lakini pia kwa namna ya upekee, nawashukuru Wajumbe na makatibu wa kamati hii ya Kusimamia Ofisi za Viongozi Wakuu wa Kitaifa kwa kazi zao nzuri wanazozifanya wakati wote wa kazi za Kamati, jambo ambalo limenipa wepesi kuweza kuiongoza Kamati hii. Wajumbe wameonesha umahiri na uweledi wa hali ya juu, na wameweza kuijadili ipasavyo taarifa hii ya utekelezaji na kuhoji mambo mengi ya msingi, kwa lengo la kuhakikisha kuwa fedha zinazoidhinisha katika Baraza la wawakilishi hili, zinatumika vizuri kwa maslahi mapana ya wananchi wa Zanzibar.

**Mheshimiwa Spika,**

Napenda kutumia fursa hii pia, kuwapongeza na kuwashukuru Wawakilishi wote waliomo katika Baraza lako Tukufu, kwa kuendelea kuwawakilisha na kuwatumikia wananchi wetu waliotuchagua. Ni wazi kwamba wananchi wamejenga imani kubwa kwetu, nasi hatuna budi kurejesha imani hiyo kwao, kwa kuwatumikia kwa dhati na kwa moyo wetu wote, kwa dhamira na lengo lile lile la kuleta maendeleo ya nchi yetu kwa ajili ya maslahi ya wananchi wetu wote tunaowawakilisha katika Baraza hili tukufu.

**Mheshimiwa Spika,**

Kabla ya kuendelea na hotuba hii, kwa ruhusa yako, na kwa heshima ya kipekee naomba kuwatambua Wajumbe wa kamati ya Kusimamaia Ofisi za Viongozi Wakuu wa Kitaifa kama ifuatavyo:

- |                                       |              |
|---------------------------------------|--------------|
| 1. Mheshimiwa Omar Seif Abeid         | Mwenyekiti   |
| 2. Mheshimiwa Panya Ali Abdallah      | M/Mwenyekiti |
| 3. Mheshimiwa Amina Iddi Mabrouk      | Mjumbe       |
| 4. Mheshimiwa Ame Haji Ali            | Mjumbe       |
| 5. Mheshimiwa Hussein Ibrahim Makungu | Mjumbe       |
| 6. Mheshimiwa Mussa Ali Mussa         | Mjumbe       |
| 7. Mheshimiwa Mtumwa Suleiman Makame  | Mjumbe       |

Aidha Kamati hii inafanyakazi na makatibu wawili ambao wamekuwa wakitusaidia na kutushauri kwa karibu sana na kwa kiasi kikubwa na kwa uweledi wa hali ya juu katika kutekeleza majukumu yetu ambayo yametupatia Kamati hii heshima na mafanikio makubwa. Makatibu hao ni:-

1. Ndg. Karima Abdul-Wahab

Katibu

2. Ndg. Talib Enzi Talib

Katibu

**Mheshimiwa Spika,**

Ni jambo la lazima kwa kila wizara kuwasilisha mbele ya Baraza Taarifa ya utekelezaji wa maagizo ya Kamati katika Mkutano wa Baraza wa mwezi wa Septemba au Oktoba kwa kila mwaka. Kwa mujibu wa Kanuni ya 108(15) Kanuni ya Baraza la Wawakilishi Toleo la 2016 ambapo kwa mujibu wa Kanuni hii, Taarifa ya utekelezaji wa maagizo ya Kamati ni lazima kwanza iwasilishwe katika Kamati za Kudumu ya Baraza zinazosimamia wizara hizo kabla ya kuwasilishwa katika Baraza. Kwa hivyo Kamati ya Kusimamia Viongozi wakuu wa Kitaifa inawasilisha mbele ya Baraza lako tukufu taarifa ya utekelezaji wa maagizo ya kamati ili kukidhi matakwa ya Kanuni ya 108(15) ya Kanuni za Baraza la Wawakilishi.

**Mheshimiwa Spika,**

Taarifa hii ya utekelezaji inatokana na Maagizo ya Kamati yaliyojitokeza baada Kamati kuwasilisha ripoti yake ya utekelezaji wa Wizara na kujadiliwa na Baraza katika Mkutano wa Mwezi Febuari kama Kanuni ya 108(14) inavyoelekeza.

Katika Bajeti ya 2016/17 Kamati yangu ilitoa maagizo kadhaa kwa Taasisi inazosisimamia. Hivyo taarifa hii inatoa muelekeo wa hali halisi ya utekelezaji wa maagizo hayo, Kwa upande wa Ofisi ya Rais Mwenyekiti wa Baraza la Mapinduzi kwa mwaka wa fedha 2016/17 iliagizwa na Kamati kutekeleza maagizo ambayo yalielekezwa na kuchukuliwa hatua kupitia Idara tofauti, ambapo kwa mgawanyo wa Kiidara ni kama ifuatavyo:

**Ofisi ya Faragha,**

**Mheshimiwa Spika,**

Nianze uchambuzi wa ripoti hii kwa kuiangalia Ofisi ya Faragha ya Mhe.Rais, Nachukuwa fursa hii kuipongeza Ofisi ya faraha ya Mhe. Rais na Mwenyekiti wa Baraza la mapinduzi kwa kutekeleza baadhi ya maagizo na ushauri uliotolewa na Kamati, ikiwa ni pamoja na kuweka makontena ya kuhifadhi taka katika Ikulu ya Migombani kwa lengo la kuimarisha usafi wa mazingiza katika eneo hilo.

**Mheshimiwa Spika,**

Kamati yangu pia inaipongeza Wizara na Serikali kwa ujumla kwa kuhakikisha kuwa imepima na kuyapatia hati za umiiki maeneo yote ya nyumba za mapumziko za Mhe. Rais.

Pia Kamati yangu inaipongeza Ofisi ya Rais Mwenyekiti wa Baraza la Mapinduzi kwa kutenga bajeti kwa kazi ya ujenzi wa uzio wa ukuta katika Ikulu ndogo Michewezi na Mkokotoni katika mwaka wa fedha 2017/18, aidha kwa upande wa ikulu ya Bwefum Ofisi ya Rais imefanya jitihada kubwa za kuweka uzio wa waya katika Ikulu hiyo. Kamati inasisitiza suala la ujenzi wa ukuta wa kudumu katika maeneo hayo ni jambo muhimu kwa ajili ya usalama wa nyumba hizo .

**Mheshimiwa Spika,**

Hata hivyo Kamati yangu imebaini kuwa tatizo hilo bado ni kubwa mno kwa karibu Ikulu zote za makaazi ya viongozi wetu wa kitaifa. Hali hii inatishia usalama na amani ya nyumba hizo.

**Mheshimiwa Spika,**

Hivyo Kamati yangu inaishauri Serikali kulizingatia suala hili na kuliingiza katika miradi ya maendeleo ya kitaifa ili iweze kulishughulikia kwa umuhumu wa aina yake, vyenginevyo linaweza likaleti madhara makubwa katika nyumba hizo. Kamati imeona kuwa suala hili sibusara kuendelea kuliachia bila ya kulishughulikia pamoja na kwamba bajeti ya wizara husika peke yake haiwezi kukidhi huduma zinazohitajika ili kujenga kuta na kudhibiti mmon'gonyoko katika majengo yote ya nyumba za mapuumziko za Mhe. Rais Kamati inaiomba Serikali kuipa kipaumbele miradi ya kuhifadhi nyumba zote za Mhe. Rais.

**Mheshimiwa Spika,**

Kwa upande wa Ikulu ya Mkoani licha ya jitihada zinazochukuliwa na Afisi ya Rais za kukabiliana mmong'onyoko wa ardhi katika Ikulu hiyo kwa kutumia ujenzi maalum wa kuweka vikuta na huku ikiwa tayari Wizara ya Ujenzi na Mawasiliano imeshakabidhiwa fedha kwa kazi hiyo. Kamati inasisitiza kuwa Afisi ya Rais walipe uzito suala hili na kuwaharakisha Wizara ya Ujenzi na Mawasiliano kukamilisha ujenzi huo haraka ili kulinusuru eneo hilo lisizidi kuharibika.

**Mheshimiwa Spika,**

Kamati inaipongeza Afisi ya Rais kuufanyia kazi ushauri wa Kamati kwa kuchukuwa hatua za kuzuia mmong'onyoko wa ardhi katika Ikulu ya Migombani kwa kujenga misingi ya kupitisha maji na kuzuia kutokea kwa mmong'onyoko wa ardhi. Pamoja na kufanya Matengenezo makubwa katika Ikulu ndogo ya Laibon ikiwa ni pamoja na kujenga nyumba ya wafanyakazi, kuweka uzio na vipoza hewa. Aidha Kamati inashauri katika maeneo ya Ikulu ya Bwefum na Kibweni, kuchukuwa hatua za haraka za kuzuia

mmong'onyoko unaosababishwa na mawimbi ya bahari yasiendeleo kuathiri zaidi maeneo hayo.

**Ofisi ya Baraza ya Mapinduzi**

**Mheshimiwa Spika,**

Kamati imeitaka Wizara kufanya jitihada za kuimarisha maktaba katika ofisi ya Baraza la Mapinduzi sambamba na uanzishwaji wa maktaba ya kielektroiniki yaani "*E-Library*" ili kuwawezesha waheshimiwa viongozi kuweza kutumia maktaba hiyo mahali popote.

**Mheshimiwa Spika,**

**Idara ya Mawasiliano na Habari,**

Kamati imeridhishwa na jitihada zinazochukuliwa na Idara ya Mawasiliano na Habari Ikulu katika kutangaza habari na matukio mbali mbali ambayo yanamuhusu Mh.Rais. Miongoni mwa kazi nzuri wanazofanya ni kutoa jarida la Ikulu ambalo husheheni taarifa mbali mbali za Mh, Rais pamoja nakurusha shughuli za Mh.Rais Moja kwa moja. Aidha Kamati inaipongeza Afisi ya Rais kupitia Idara ya Mawasiliano kwa kuratibu shughuli za Mh.Rais pale anapongea na wadau na kuwezesha taarifa hizo kufika haraka kwa wananchi. Pia tunaipongeza Idara ya Mawasiliano na Habari kwa kuweza kujikita na kasi ya ulimwengu wa habari unavyokwenda kwa kutumia mitandao ya kijamii kuweza kufikisha taarifa.

**Mheshimiwa Spika,**

Idara ya Mawasiliano na Habari imeweza kuimarisha Tovuti ya Ofisi ya Rais na sasa imekuwa na watumiaji wengi na imekuwa na taarifa nyingi zaidi.

**Mheshimiwa Spika,**

**Idara ya Ushirikiano wa Kimataifa na Uratibu wa Wazanzibar Wanaoishi Nje ya Nchi (Diaspora).**

Kamati inaipongeza Idara ya ushirikiano wa Kimataifa kwa kuweza kukamilisha Sera ya Diaspora pamoja na kuandaa kongamano la Diaspora kwa mafanikio makubwa.

Kamati inasisitiza juu ya umuhimu wa kuyafanyia kazi masuala muhimu yanayowagusa Wazanzibar walipo nje ya nchi.

Aidha, Kamati inasisitiza Sera ya Diaspora ifanyiwe utekelezaji haraka.

**Mheshimiwa Spika,**

**Afisi ya Rais Pemba,**

Kamati inaipongeza Afisi ya Rais Pemba kwa kupokea ushauri wa kamati wa kutenga eneo maalum la kugesha magari ya Viongozi Pemba ambalo wanatarajia kulitekeleza kwenye bajeti ya 2018/19. Kamati inasisitiza kuwa suala hilo la kutenga eneo la kugesha magari ya viongozi Pemba ni muhimu na linapaswa kupewa uzito unaostahiki.

**Mheshimiwa Spika,**

**Ofisi ya Usalama wa Serikali - GSO**

Kamati yangu inaipongeza kwa dhati Ofisi ya Rais kwa kuona umuhimu wa kuongeza Bajeti kwa Idara ya GSO ili iweze kutekeleza majukumu yake kwa ufanisi zaidi.

Aidha, Kamati inapongeza Ofisi ya Rais na Mwenyekiti wa Baraza la Mapinduzi katika hatua za kuandaa Sheria na Kanuni zake za uwepo wa Idara ya GSO Zanzibar. Kuwepo kwa Sheria hiyo kutaiwezesha taasisi hiyo kufanya kazi zake kwa nguvu zaidi za kisheria .



**Mheshimiwa Spika,**

Aidha, Kamati inaipongeza Ofisi ya Rais kwa kuuzingatia ushauri wa Kamati kupanga kulifanyia matengenezo na kuweka thamani katika Afisi za GSO katika mwaka wa fedha 2017/2018 ambapo kamati imeona kuwa suala hili ni muhimu na lipewe umuhimu uanaostahili. Aidha ni jambo jema kwa Afisi hiyo kupatiwa gari kwa lengo la kurahisisha utendaji wao kwa ufanisi zaidi.

**Hitimisho:**

**Mheshimiwa Spika,**

Baada ya maoni hayo ya kamati ambayo yamejaribu kwa kiasi kikubwa kuakisi hali halisi ya utekelezaji katika Wizara ya Nchi Ofisi ya Rais Mwenyekiti wa Baraza la Mapinduzi Zanzibar ni imani yangu kuwa taarifa hii ya Kamati ya Kusimamia Ofisi za Viongozi Wu wa Kitaifa yatasaidia sana kuimarisha utendaji katika Wizara hiyo. Hivyo nawaomba wajumbe wengine wa Baraza lako tukufu, waichangie vyema taarifa hii, kwa lengo la kupata utekelezaji bora wenye maslahi kwa wananchi wetu.

Mwisho kabisa, napenda kukushukuru tena, wewe binafsi, **Mheshimwa Spika**, kwa kunipa nafasi ya kuwasilisha taarifa ya Kamati yangu kwa niaba ya Kamati, pamoja na kuwashukuru Wajumbe wa Baraza lako Tukufu kwa kunisikiliza kwa umakini mkubwa, sasa niwaombe Wajumbe wa Baraza lako waijadili ili wamuwezeshe Waziri kufanikisha kazi zake kwa ufanisi mkubwa .

Kwa niaba ya Kamati ninayoiongoza ya Kusimamia Ofisi za Viongozi wakuu wa Kitaifa naomba kuwasilishas.

**Mheshimiwa Spika,**

Mwisho naomba kuwashukuru Wajumbe wote wa Baraza la Wawakilishi kwa kunisikiliza kwa umakini na utulivu mkubwa.

**Mheshimiwa Spika,** naomba kuwasilisha.

.....

**OMAR SEIF ABEID**  
Mwenyekiti,  
Kamati ya Kusimamia Ofisi za Viongozi Wakuu wa Kitaifa,  
Baraza la Wawakilishi,  
Zanzibar.